



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVII No. 24
Disyembre 21, 2006
www.philippinerevolution.net

Editorial

Indi mag-untat ang pumuluyo Sa pagbato sa padihut nga Cha-cha

Sunud-sunod ang mga kapaslawan nga gin-angkon sang rehimeng Arroyo sa pagpamilit sini nga idu-so ang Cha-cha (*charter change* ukon pagbag-o sang konstitusyon) antes ang eleksyon sa Mayo 2007. Isa-isa nga nalugaw-an ang mga ginpadihut sini nga pamaagi agud matuman ini.

Una amo nga ginbasura sang Korte Suprema ang peke nga people's initiative nga nagatuyo nga baguhon ang sandigan nga layi paagi sa petisyon kuno sang minilyon nga pumuluyo. Nabuyagyag ini bilang daku nga pagpanunto sang mga idu-ido ni Arroyo.


Makaligad nga mauntat ang peke nga *people's initiative*, pila ka simana lamang ang naglipas gintuyo naman nga ilusot sang mga gaway ni Arroyo sa Kongreso ang "pinasimple nga *constituent assembly*" ukon "con-ass" nga nagapwera sa Senado, padalasa nga pag-transporma sang Manubo nga Panalغان padulong sa asembleya nga magabag-o sa porma sang gubyrno halin presidensyal pakadto parlamentaryo kag pagpahigad sa regular nga eleksyon sa Mayo pakadto sa Nobyembre sa idalum na sang sistemang parlamentaryo.

Hayagan nga ginatorse sang maki-Arroyo nga mga kongresista ang layi kag establisadong mga proseso agud ipamilit ini. Ang ining tuman ka baghal nga manipulasyon kag pag-

panglubag para ipilit ang "pinasimple nga *con-ass*" nag-ani sang grabe nga kaakig kag mabaskog nga pagkundena sang malapad nga kubay sang pumuluyo. Nagpamahog ang nagkalain-lain nga sektor sang paglunsar sing wala untat nga dalagkuan nga protesta nga naga-duso na sa rehimen sa bibi sang pagkapukan. Napilitan si Arroyo nga ipaiway anay ang "con-ass" para maglugdang ang nagaindakal nga kaakig sang pumuluyo.

Sa amo man, gintinguha gihapon ni Arroyo nga magkambyo kag gilayon naman nga ginduso sang mga sugo sang Malakanyang ang paspasan nga *constitutional convention*. Ginsuhestyon nila ang pagpili sang mga delegado para diri sa maabot nga Mayo kadungan sang regular nga eleksyon.

Wala na ini ginpalampas sang nagabalingaso nga pumuluyo. Bistado na nila nga



**Mga tampok
sa isyung ini...**

Cha-cha, ginsug-alaw
sg protesta PAHINA 3

Kinamatarung sg
Pilipinas nga ibilanggo
si Smith PAHINA 5

Kasugtanan
pangkalinungan
sa Nepal PAHINA 8

sa likod sang amo nga baraghal kag tiko nga mga manipulasyon ang handum sang kampo Arroyo nga makapanguyapot pa sa poder. Sugod nga naglupok ang iskandalo bahin sa "Hello Garci" tapes nangin saksi na ang pumuluyo sa sunud-sunod nga kabutigan, mahigko nga maniobra, baraghal nga pagpanglubag kag hayagan nga kapintas sang nagaharing hubon Arroyo para makapabilin ini sa gahum.

Amo na lamang ang pagdali-dali sang nagaharing hubon nga iduso ang Cha-cha kag kanselahon ang nagahilapit nga piniliay bangud daku ang kahadlok ni Arroyo nga malampaso ang iya mga kaalyado kon madayon ang eleksyon sa Mayo. Kon nadula sa kamot niya ang mayorya sa Kongreso, mangin bulnerable siya sa panibag-ong serye sang mga prosesong ligal nga patud nga igasulong sang iya mga karibal sa pulitika, pati sang mga demokratikong pwersa kag iban pang grupo nga nasuka na gid sa rehimeng Arroyo.

Indi na niya basta-basta matabunan ang mga kaso nga lapnagon nga pagpamuyong, lapnagon nga pagdinaya sa eleksyon sang 2004, brutal nga pagpamatay sa mga lider

kag myembro sang mga demokratikong organisasyon kag pagsabwag sing kagugmat sa kubay sang malapad nga masa sang pumuluyo. Madulaan na siya sang panaming sa masunod nga kasong *impeachment* nga igapasaka kontra sa iya. Lubos siya nga mahamulag kag may katalagman nga mapatalsik kag mapanaugan sing nagadapat nga silut.

Luwas sa pagpataw sang layi militar kag pagpaluntad sang hayagan nga pasistang pagginahum, ang Cha-cha na lamang ang solo nga nabilin nga paagi para malampasan ni Arroyo ang bangungot nga ini. Desperado siya nga magsandig diri para makapabilin sa gahum, mapalagyuhan ang mga salabton niya sa pumuluyo, padayon pa nga pagpamuyong kag makapatuman sing labing mapiguson nga mga ti-kang agud mawasak ang kaaway. Para makasiguro siya sa suporta sang amo niya nga imperyalistang US, lubos na niya nga igasubasta ang nasyunal nga patrimonya kag igabukas sing husto sa dumuluong nga pagpasilabot kag kontrol ang teritoryo, ekonomya kag pulitika sang Pilipinas. Ang sunud-sunod nga kapaslawan ni Arroyo nga mapamilit gihapon ang Cha-cha antes

ang eleksyon sa Mayo amo ang bu-nga sing wala untat nga pagpamatuk sang malapad nga pumuluyo kag pagbato nila sa nagkalain-lain pang porum kag labi sa tanan, sa karsada.

Aktibo kag determinado nga naghulag ang mga patriyotiko kag demokratikong pwersa, oposisyon nga anti-Arroyo, nagkalain-lain nga simbahan kag iban pang napukaw nga pumuluyo. Ginapaabot nila ang ila grabe nga pagkangil-ad sa kadalok sa gahum sang hubon Arroyo, sa tuman nga kagarukon sini nga pagdumala, sa mapintas na pagtapna sa mga basehang kinamatarung kag sobra-sobra nga pag-ikog-ikog sa dumuluong nga gahum kag interes.

Nahibal-an sang napukaw na nga pumuluyo nga indi mag-untat ang rehimeng Arroyo sa pagpangita sang lugar para buhion liwat ang makapila ka beses na nga ginpatay nga iskemang Cha-cha. Sa kamatuoran, matapos niya hambalon nga ipahigad anay ang Cha-cha gilayon nga bumaliskad si Arroyo kag nanawagan sining Disyembre 19 sang panibag-ong "*people's initiative*" sa Enero. Ginsal-an niya nga talamdan sing pagkalma sang kaakig sang pumuluyo ang indi pagluntad sing malahigante nga demonstrasyon sang anti-Cha-cha nga *prayer-rally* sa Luneta sadtong Disyembre 17.

Samtang, pananglitan mapaslawan liwat kag madayon gihapon ang eleksyon sa Mayo, pagadayaon liwat ni Arroyo ang eleksyon agud mapat-ud nga dampig pa gihapon sa iya ang mayorya sang Kongreso kag mga lokal nga gubyerno. Pagapiliton man niya nga madugangan ang iya kadampig sa Senado. Magaula ang dugo, magabwelo ang kalakasan kag maglapta ang kwarta nga pangsuhol sa Mayo 2007 agud makuha ni Arroyo ang mayorya sini.

Sundan sa "Editorial....," pahina 3

ANG BAYAN Disyembre 21, 2006

Tuig XXXVII No. 24 Disyembre 21, 2006

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa:
angbayan@yahoo.com

Kaundan

Editorial: Indi mag-untat ang pumuluyosa pagbato sa Cha-cha	1
Cha-cha, ginsug-alaw sg protesta	3
Kinamatarung sg Pilipinas nga ibilanggo si Smith	4
7 patay sa sulod sang duha ka semana	5
Magtiayon, nagpakamatay bangud sa tortyur	6
Kasugtanan pangkalinungan, ginlagdaan sa Nepal	7
Madinalag-on nga opensiba	10
Balita	10

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas

Padihut nga Cha-cha, ginsug-alaw sang serye sang mga aksyong protesta

Ginsug-alaw sang sunud-sunod nga mga aksyong protesta sa nagkalain-lain nga bahin sang pungsod ang ginapamilit nga Cha-cha (*charter change*) sang rehimeng Arroyo kag mga idu-ido sini sa Kongreso. Natabo ang sunud-sunod nga paghulag sining ulihi nga simana para ipabatyang sang pumuluyong Pilipino ang ila mabaskog nga pagpamatuk sa ginaplano sang Malakanyang nga ilusot ang isa ka konstitusyon nga magapabilin kay Arroyo sa poder kon indi man ini paagi sang *constituent assembly* (*con-ass*) ukon sa *constitutional convention* (*con-con*).

Ang malaparan nga prayer-rally sa Luneta sining Disyembre 17 nga ginpamunuan sang Catholic Bishops Conference of the Philippines (CBCP) kag ginsuportahan sang Bagong Alyansang Makabayan kag nagkalain-lain nga mga demokatikong organisasyon, National Council of Churches of the Philippines kag ibang organisasyong relihoyoso kag pati mga mamalidha kag lider sang oposisyon nagapatimaan sang pagbalingaso gihapon sang pumuluyo sa pihak sang pagtinguha sang mga gaway ni Arroyo nga pakalmahon ang ila kaakig kag idiskaril ang paghulag. Matapos mapilitan nga ipahigad ang padihut nga Cha-cha, desperadong ginkumbinsi sang Malakanyang ang nagkalain-lain nga nagapamatuk nga sekta sang simbahan kag ang malapad nga pumuluyo nga indi na padayon ang nakatalana nga *prayer-rally* bangud patay na kuno ang Cha-cha.

Sa pihak sini, nagtambong giha-pon ang libu-libo nga pumuluyo halin sa nagkalain-lain nga sektor. Ini sa pihak man sang madamu nga res-

triksiyon nga ginpataw sang mga pulis sa mga magatambong diri, mga himu-himo nga istorya bahin sa pamahug nga manggamo kuno ang mga terorista kag pamahug nga arestuhon ang sin-o man nga magasaka sa entablado kag magkundernar sa rehimeng Arroyo. Antes ini, nagtipon bandang alas-10 pa lang sang aga kag naghiwat sang programa sa Liwasang Bonifacio ang mga katapu sang Bayan Muna, Anakpawis, Gabriela Women's Party, BAYAN kag mga alyadong organisasyon pareho sang Kilusang Mayo Uno, Kilusang Magbubukid ng Pilipinas, LFS, Anakbayan, COURAGE kag ibang progresibong organisasyon. Halin diri nagmartsa sila padulong sa Luneta agud magsimpon sa mas daku nga rali sa hapon. Dungan man nga naghiwat sang *prayer-rally* sa mga diocese sang simbahan Katoliko sa Calamba, Laguna kag Cavite City. Sa Cebu City, ginpangunahan sang JIL, Philippine Independent Church kag iban pang sektang Protestante ang paghulag.

Matapos ang *prayer-rally*, nag-



martsa pakadto sa Palasyo sang Malakanyang ang libu-libong myembro sang partido Bayan Muna, BAYAN kag mga alyadong organisasyon sini. Bitbit nila ang mga sulo, istremer kag plakard nga nagakundernar sa baraghal nga pagtinguha sang kampo Arroyo nga torsehon ang layi kag mga proseso para ipamilit ang padihut nga Cha-cha. Ginpanawagan nila ang pagpatalsik sa rehimen nga dalok sa gahum. Wala sila makatungtong sa maragtasang Tulay sang Mendiola sang balabagan sila sang mga pulis sa Morayta.

Antes suguran sang mga idu-ido ni Arroyo ang pagpulong para sa *con-ass* nagtukod na sang mga tol-da ang mangunguma nga katapu sang KPM sa palibot sang Batasan Complex agud magpahayag sang ila protesta. Masunod nga adlaw, Disyembre 12, nagmartsa ang 25,000 nga katapu sang BAYAN kag Laban ng Masa padulong Batasan Complex. Gin-abangan sila sang mga *anti-riot*

Sundan sa "Protesta....," pahina 4

"Editorial....," halin sa pahina 2

Puno na gid ang banwa kag tu-man na ang pagkangil-ad sang malapad nga pumuluyo sa rehimeng Arroyo. Dugang nga masanaaw kag nagadaguob subong ang mabaskog nga pagpamatuk sang nagkalain-lain nga sektor sang malapad nga pu-

muluyo sa iskemang Cha-cha kag ang padayon nga pagginahum sang rehimeng Arroyo. Umpisa pa lamang sing nagapataas nga lebel sang pagpanukot ang serye sang mga paghulag sining Disyembre. Malau-man ang nagapadayon kag nagapadaku pa nga mga paghulag sang tanaan nga mga pwersang rebolusyo-

naryo, patriyotiko, demokratiko kag iban pang pwersa nga anti-Arroyo kag sang malapad nga masa sang pumuluyo para batuan kag paslawon ang maitom nga planong Cha-cha. Indi mag-untat ang pumuluyo sa pagbato sa pagginahum Arroyo kag mga nagapadihut sini tubtub indi lubos nga matapos. AB

Kinamatarung sang Pilipinas nga bilangguon

Ginpanindugan ni Judge Benjamin Pozon sang Branch 139 sang Makati City Regional Trial Court ang kinamatarung sang Pilipinas nga bilangguon si Lance Corporal Daniel Smith, ang Amerikanong suldao nga nahusgahan sa Subic *rape case*. Ginbasura liwat ni Pozon sining Disyembre 13 ang petisyon nga ginpasaka sang abugado ni Smith nga sayluhon siya sa kustodiya sang US. Sandig sa desisyon nga ini, magapabilin si Smith sa Makati City Jail. Sadtong Disyembre 4, ginhusgahan ni Pozon si Smith nga maysala sang panglugos kag mabilanggo sing tubtub buhi.

Gilayon nga ginpamilit sang mga upisyal sang US Embassy nga sila dapat ang magakapot kay Smith. Ginabangdanan nila ang mga probisyon sang Visiting Forces Agreement nga siling niya nagahatag sa ila sang kinamatarung nga kaptan si Smith samtang indi pa tapos ang “prosesong hudisyal.”

Wala man sing duha-duha ang Department of Justice (DOJ) kag ang Department of Foreign Affairs (DFA) sa pagsuporta kag daw pangabugado para sa US. Isa ka gingtingub nga pahayag ang ginpaggwa nanday US Ambassador Kristie Kenny kag DOJ Secretary Raul Gonzalez nga nagasaad sang pag-isa nga ipaidalum si Smith sa awtoridad sang US.

Ginbasura ni Judge Pozon ang

pahayag nga ini kag wala siya nalingkang sa presyur sang US, DOJ kag DFA. Ginpanindugan niya nga ang Pilipinas ang siya nga dapat magpili sang bilangguan kon diin igahunong si Smith. Siling niya, indi na aplikable ang ginatumod nga probisyon sang VFA bangud natapos na ang “prosesong hudisyal” sang mahusgahan si Smith sa panglugos kay “Nicole.” Ginhambal man ni Judge Pozon nga indi awtorisado ang DOJ nga magsulod sa isa ka kasugtanan sa gubyerno sang US bangud ang pangulo lamang sang pungsod ang may gahum sini.

Sa pagdampig sang DOJ sa US nanging labing maathag ang kawadon sini sang simpatiya sa biktima nga si “Nicole” kag sa interes sang pumuluyong Pilipinas. Liwat nga

nalugaw-an man ang apila sang abugado ni Smith sadtong Disyembre 14 nga ipabaliskad sa Court of Appeals (CA) ang mandu ni Judge Pozon kag ibalik sa US Embassy ang kustodiya kay Smith. Ginbasura ini sang CA sining Disyembre 19 sa basehan nga indi ini nakapanahon bangud wala pa napamatud-an nga arbitraryo kag despotiko ang paghusga ni Judge Pozon. Baliskad sa petisyon ni Smith, nagapati ang CA nga wala siya sang agumon nga permanenteng kahalitan samtang nagapabilin siya sa Makati City Jail. Siling sini, natigayon na ang pagbista kon sa diin ginkilala ang tanan nga mga kinamatarung sang sadto akusado.

Sa Disyembre 25, magapasaka sang petisyon si “Nicole,” upod ang mga anay senador nga sanday Jovito Salonga kag Wigberto Tanada, agud hingyuon sa CA nga ipasa sini sa Korte Suprema ang kaso kaangot sa pagtalana sang kustodiya kay Smith bangud labag na sa konstitusyon sang Pilipinas ang gusto matabo sang US kag ang halambalanon nga ini lampas na sa hurisdiksyon sang CA. **AB**

“Protesta....,” halin sa pahina 3

police antes pa man mag-abot sa bilding. Samtang, nag-walk-out ang Senate Employees Union nga may 1,700 katapu. Suno sa ila, adlaw-adlaw nila nga himuon ini tubtub nga mabasura ang Cha-cha.

Bisan nga ginsaylo sa Disyembre 17 ang nakatalana nga *prayer-rally* sadtong Disyembre 15 bangud ginreserba na ang Luneta para sa Philippine Gaming Corporation (Pagcor) nga ginpagguwa nga nau-na nga may aplikasyon, gindayon gihapon ang mga aksyong protesta sa nagkalain-lain nga bahin sang pungsod. Naghiwat sang mga rali

sa mga diocese sang Novaliches, Quezon City; Malolos, Bulacan; kag Balanga, Bataan. Mga 5,000 nga relihiyoso, propesyunal kag estudyante ang nagmartsa sa mga mayor nga karsada ng Dagupan City antes sila magtipon sa plasa. Sa Negros, naglab-ot sa 30,000 ang nagtambong sa mga syudad sang Bacolod, Kabankalan, San Carlos, Cadiz kag Escalante sa Negros Occidental kag Guihulngan sa Negros Oriental. Sa Iloilo City, nagmartsa sa pangunahong kalye sang syudad ang masobra 1,000 nga myembro sang BAYAN kag Laban ng Masa antes mag-simon sa *prayer-rally* nga ginhiwat ni Archbishop Angel Lagdameo,

presidente sang CBCP. Nagmartsa man ang 800 katawo sa Roxas City.

May mga paghulag man sa Kidapawan, North Cotabato kag Marbel, South Cotabato; Ozamis City; Cagayan de Oro; kag Digos, Davao del Sur.

Sa sobrang kahadlok ni Arroyo, ginmandu niya ang pagtukod sang mga tsekpyont sa mga dalan pasulod sa Metro Manila. Anum kalibo nga tropa ang gindeploy sa Luneta samtang ang iban ginpakat sa mga estratehikong karsada. Maluwas pa ini sa mga tropang militar nga nakapalibot sa Malakanyang nga daw garison sadtong adlaw nga ina. **AB**




7 patay sa sulod sang duha ka simana

Pito ka aktibista ang ginpatay sang mga *death squad* sang rehimeng Arroyo sa nagkalain-lain nga bahin sang pungsod sining nagligad nga duha ka simana. Lakip diri ang isa ka myembro sang Partido Suara Bangsamoro, mga lider-unionista sa Cavite kag Mindanao, isa ka lider sang Anakbayan, duha ka myembro sang Bayan Muna, isa ka lider sang lokal nga organisasyong masa kag isa ka abugado sang tawhanong-kinamatarung. Tatlo ka aktibista ang napilasan sa mga pagpang-atake kag isa ang ginkuot.

Sa kadamu sang mga lider kag myembro sang mga progresibong organisasyon nga ginpamatay sa Cagayan Valley nalakip na ang rehiyon sa listahan sang Central, Bicol kag Southern Tagalog nga may pinakamadamu nga biktima sang pangpulitika nga pagpamatay.

Disyembre 18. Ginkuot sang tatlo ka armadong lalaki nga nakafatigue kag nakabonet ang pilason nga si Rahman Camili, 34, myembro sang Suara Bangsamoro halin sa iya balay sa Barangay Madaum, Tagum City. Pwersahan nga nagsulod sa iya balay sang alas-2:20 sang kaaganhon ang mga kriminal kag ginpatumtuman ang asawa. Sang makita sang mga berdugo si Camili gilayon siya nga ginluthang sa tiil kag tiyan kag ginguyod pagguwa. Ginsakay siya sa isa ka kolor berde nga *van* nga may plaka nga LFV-678. Suno sa mga nakasaksi, nagaabot sa 20 lalaki nga naka-*full battle gear* kag nakasukso sang itom ang nagapalibot sa balay ni Camili.

Disyembre 17. Namatay sa ospital si Gerson Lastimoso, myembro sang Nagkahiusang Mamumuo sa Suyapa Farm (NAMASUFA) matapos siya mapilasan sang ambuson siya kag apat pa nga lunsay unionista sa Crossing Alegria, Compostela Valley



sadtong Disyembre 15 sang aga. Upod ni Lastimoso nga inambus ang mga upisyal sang unyon nga sanday Vicente Barrios, presidente; Andres Lagare, bise presidente; kag Aldin Cortez, board member; kag si Doniglenn Sundon, myembro sang NAMA-SUFA. Napilasan sing gamay sa pagpanglambat sanday Barrios kag Cortez samtang kritikal ang kahimtangan ni Sundon. Pasulod sa trabaho ang mga biktima sa Fresh Banana Agricultural Corp. (FBAC) Packing Plant 90 sang sila ginpangluthang.

Madumduman nga padayon ang kinagamu sang mga obreros kag maneydsment sa FABC nga ginapanagiyahan sang Andres Soriano Group kag madugay na nga nakabaton si Barrios sang mga pagpamahug sa iya kabuhi. Ginapakigbato sang unyon nga bayaran ang *cost of living allowance*, *holiday pay*, *service incentive* kag iban pang benepisyo sang mga mamumugon.

Sa adlaw man nga ini ginlut-

hang kag naigo sa tiil si Roque France, 64, bag-ong napilian lamang nga tagapangulo sang Dagup Igurut Asosasyon. Gintuyo ang kabuhi ni France sa atubang sang iya balay sa Cabiraoan, Gonzaga, Cagayan samtang naga-pakadto siya sa rali batuk sa Chacha nga inorganisa sang mga militanteng grupo sa prubinsya.

Disyembre 13. Ginpatay sang anum ka suldado sang 21st IB si Nelson Asosena, 19, myembro sang Anakbayan kag Caguimongan kag tagapangulo sang Sangguniang Kabataan sa banwa sang Rizal, Cagayan. Suno sa mga utod niya, ginpaulanan sang bala si Asosena sang mga suldado nga nagpakuno-kuno makig-inom sang tubig sa ila balay sa Barangay San Juan, Rizal.

Suno sa Kilusang Magbubukid ng Pilipinas (KMP), utod nga organisasyon sang Caguimongan, tatlo pang lider sang KMP sa Cagayan—sanday Pasciano Payay, Albert Himmiwat kag Vilma Mangili—ang hugot nga ginabantayan sang militar kag ginakakulbaan nga targeton man sang *death squad*.

Disyembre 12. Ginluthang sang duha nga lalaki nga nakamotorsiklo si Gil Gojol, isa ka abugado sang tawhanong-kinamatarung, kag ang iya drayber nga si Danilo France sadtong alas-9:45 sang aga sa Sityo Naduyan, Barangay Payawin, Gubat, Sorsogon samtang pabalik na ang duha sa Sorsogon City halin sa ila ka pagbista. Si Gojol, nga napulo ka tuig na nga nagakapot sang mga kaso sang paglabag sa tawhanong-kinamatarung nangin abugado ni Danilo Borjal sadtong 1996 kag ni Sotero Llamas. Si Borjal amo ang konsultant sang National Democratic Front sa halambalanon pangkalinungan sa subong. Si Llamas naman daan nga lider-rebolusyonaryo sa Bicol nga ginpatay sadtong Mayo.



Sa isa ka panahon, gintanyagan si Gojol nga mangin abugado sang NDFP sa negosasyon. Siya man ang abugado sang pumuluyo nga nagapakamalaut sa pagmina sang Lafayette sa Rapu-Rapu, Albay.

Gin-abangan sang mga berdugo ang van nga ginasakan sang mga biktima kag una nga ginpatay ang drayber. Nakapanaog pa si Gojol kag nakadalagan pero nadasma siya sang mapilasan. Ginpalapitan siya sang mga berdugo kag ginluthang sa ulo, nga gilayon niya ginkamatay.

Sadtong adlaw man nga ina ginpatay sang mga berdugo nga sakay sang motorsiklo si Renato Estrella, 58, kapitan sang Barangay Atlag, Malolos City kag myembrong sang Bayan Muna (BM). Madugay na nga ginpaandaman sang militar si Estrella bangud sa iya pagpamatuk sa militarisasyon sang iya barangay kag pagsuporta sa mga aktibidad sang BM kag iban pang progresibong organisasyon.

Disyembre 11. Ginluthang sang duha ka elemento sang death squad si Crisanto Frivaldo, myembro sang BM, sa iya balay sa Irosin, Sorsogon. Si Frivaldo bata nga utod ni Max Frivaldo, konsehal sang Irosin kag myembro man sang BM nga ginpatay sadtong Enero 2006.

Sadtong adlaw man nga ina ginpatay si Jesus "Butch" Servida, 36, anay bise-presidente sang Samahang Manggagawa sa EMI-Yazaki (SME) kag isa sa mga lider sang Solidarity of Cavite Workers. Ginluthang si Servida sa atubang mismo sang pabrika sang SME, isa ka pabrika sang mga semiconductor sa Barangay Anabu 2A, Imus, Cavite. Napilasan man sa nasambit nga pagpangluthang ang iya mga kaupod nga sanday Joel Sale, 32, daan nga myembro sang SME kag Kenny Mari Severo, isa ka kontraktwal nga empleyado sang kumpanya.

Magtiayon, nagpakamatay bangud sa grabeng tortyur

Nagpakamatay ang magtiayon nga Librado kag Martina Gallardo, mga lokal nga lider sang United Methodist Church (UMC) sa Barangay Conversion, Pantabangan, Nueva Ecija matapos nga paliwat-liwat nga ginpaantos sang mga elemento sang 48th IB nga nagaakusar sa ila nga mga tagasuporta sang Bag-ong Hangaway sang Banwa.

Suno sa panaysayon sang ila mga anak sa mga myembro sang isa ka *fact-finding mission* sang UMC nga nagkadto sa Nueva Ecija sadtong Nobyembre 8-10, tatlong beses nga gindakup, gin-interogar kag tinortyur ang mag-asawa nga Gallardo kag utod ni Librado nga si Macera Villajuan sadtong Oktubre 9 kag 10 kag pilit nga ginapatudlo ang ginataguan kuno sang isa ka M16, kantidad nga 40,000 kag mga dokumento sa pihak sang pagpamalibad nila sang anuman nga ihibalo bahin diri.

Pinakagrabe ang tortyur nga naagum ni Librado. Matapos siya ma-interogeyt sadtong aga sang Oktubre 9 ginpatambong siya sa isa ka pangpublikong pulong kon sa diin siya gintudlo man sang 40 tagabaryo nga mga myembro man kuno sang Bayan Muna. Pagkatapos sang pulong gindala siya sa detatsment kag gimbakol siya sa dugan, ulo kag liog, ginkuga kag gintakluban sang plastik ang ulo agud indi makaghinawa. Sa sobra pagpaantos nagpalamus-on siya sa iya delargo.

Ginbuhian siya pero gindala liwat sang mga suldado si Librado kag ang iya tiayon sang masunod nga adlaw sa ila detatsment. Liwat ginpaidalum sa tortyur si Librado. Nagpamahug man ang mga militar nga pagapatyon ang bilog niya nga pamilya kon indi siya mag-ako.

Liwat ginpauli si Librado pero ginbalikan na naman sila nga mag-asawa sa ila balay sadtong aga sang Oktubre 11 kag ginapwersa nga magkadto sa detatsment. Sangsa pabudlay liwat sila ginpili sang magtiayon nga maghikog paagi sa pag-inom sang pestisidyo. Namatay sila antes makalab-ot sila sa ospital.

Ang panaysayon nakaupod sa report sang UMC nga ginpagguwa sining Disyembre 5. AB

Si Servida pangatlo na nga lider sang unyon sang EMI-Yazaki nga inambus sa sulod sang nakaligad nga duha ka tuig.

Disyembre 10. Ginpanghalug-hog kag ginkawatan sang mga elemento paniktik sang AFP ang upisina sang Bayan Muna sa Midsayap, North Cotabato. Ginkawat sang mga suldado ang isa ka kompyuter, mga disket kag mga dokumento. Gintimpo sang mga kriminal ang pagpangawat sa upisina sang magtambong sa selebrasyon sang Internati-

onal Human Rights Day sa Kidapawan City ang mga istap sini.


Disyembre 8. Pwersahan nga ginpauli sang gubyernong Arroyo si Brian Campbell, isa ka Amerikano nga abugado sang mga mamumugon. Matambong tani si Campbell sa mga aktibidad kag mga aksyong protesta kaangot sa ika-12 ASEAN Summit sa Cebu. Pagkaabot gid niya sa Ninoy Aquino International Airport sang siya pwersahan nga pasakyon sa eroplano pabalik sa Hongkong. AB



Komprehensibong kasugtanan pangkalinungan, ginlagdaan sa Nepal

Ginlagdaan sining Nobyembre 22 ang Komprehensibong Kasugtanan Pangkalinungan sa tunga sang Communist Party of Nepal-Maoist kag sang bag-ong gubyrerno sang Nepal. Ini ang bunga sang pito-ka-bulan nga negosasyon kag untat-linupok halin nga madinalag-on nga pukanon ang absolutong monarkiya ni Haring Gyanendra. Ang kasugtanan ginpirmahan nanday Kaupod Prachanda (Pushpa Kamal Dahal), tagapangulo sang CPN-M kag Girija Prasad Koirala, Prime Minister sang Nepal.

Suno sa CPN-M, sa paglagda sa kasugtanan ginatapos ang ginapamunuan sini nga 11-tuig nga inaway banwa sa Nepal, nga nagdulot sang pinakamabug-at nga bunal batuk sa pagginahum ni Gyanendra. Malapad nga kaumhan sang Nepal ang ginasakup sang Pulang gahum sa pagpamuno sang CPN-M kag kontrol sang People's Liberation Army (PLA). Ang kadalag-an sa pagbato kag pagbagsak sang pagginahum Gyanendra amo ang bunga sing maayo nga pagpamuno sang CPN-M kag paghulag sang mga rebolusyonaryong pwersa kag pumuluyo sang Nepal agud todo-todo, nagapadayon kag maayo nga maisulong ang rebolusyonaryong armadong paghimakas, malapnagon nga kahublagang masa kag malapad nga nagahiliugyong prente.



Sadtong Nobyembre 2005, ginpangunahan sang CPN-M ang pagtukod sang isa ka malapad nga nagahiliugyong prente sang lain-lain nga mga demokratikong partido

nga nakapungko sa parlamento nga ginbungkag ni Gyanendra. Nasulod diri ang CPN-M kag pito ka parlamentaryong partido anti-monarkiya. Paagi sini, dugang nga napalapad ang paghiliusa sang pumuluyong Nepal, lubos nga nahamulag si Haring Gyanendra kag direktang naphulag ang minilyon nga pumuluyo sa isa ka pag-alsa nga nagpadulong sa pagpukan sang monarkiya kag pagtukod sang isa ka demokratikong gubyrerno.

Nagasaludo ang Partido Komunista sang Pilipinas sa CPN-M, mga rebolusyonaryong pwersa kag pumuluyo sang Nepal kag pumuluyo sang Nepal sa pag-angkon sang bulawanon nga kadalag-an nga ini.

Mga potensyal sa pagsulong sang mga demokratikong prinsipyo

Kaundan sang kasugtanan pangkalinungan nga ginhimo sang CPN-M kag gubyrerno Koirala ang pagpatuman sang gubyrerno sang Nepal sang mga prinsipyo sang pumuluyo sang Nepal, nga amo ang pangunahon nga kaundan sang programa sang CPN-M para sa demokratikong rebolusyon.

Suno sa CPN-M, ginatapos sang kasugtanan ang 238-tuig nga pagginahum pyudal sa Nepal kag ginadula ang "anuman nga awtoridad sa pagpadu-

mala" sang monarkiya sa pungsod. Ginasaad man sini ang paghimo sang mga tikang agud dulaon ang mga problema sosyal nga nakabase sa relihiyon, sekswal kag caste. Ginabunga sang kasugtanan nga ini ang sitwasyon nga puno sang potensyal para sa demokratikong pagbag-o.

Lakip sa mga ginhisugtan nga partikular nga programa nga sosyo-ekonomiko ang transpormasyon sang ekonomya kag katilingban agud tapuson ang tanan nga porma sang pyudalismo. Yabi diri ang polisiya sang "syentipikong programa sa reporma sa duta" kag proteksyon kag pagpauuswag sang mga nasyunal nga industriya kag mga rekursos." Lakip man sa kasugtanan ang pagtib-ong sa kinamatarung sang tanan nga pumuluyo sa edukasyon, ikaayong lawas, pabalay, empleyo kag pagkaon.

Nakasaad man sa kasugtanan ang paghilway sa tanan nga detenidong pulitikal kag ang pagsiguro nga makabalik ang tanan nga ginpabakwit nga pumuluyo sa tagsa nila ka komunidad. Pagaimbestigahan sang isa ka tukuron nga komision ang malala nga kaso sang paglabag sa tawhanong-kinamatarung kag mga krimen batuk sa pumuluyo kag magtalana ini sang danyos para sa mga nahalitan sang gera. Ginatakda sang kasugtanan ang pagtukod sang bag-ong gubyrernong koalision sang tanan nga mga pwersang anti-monarkiya kag antipyudal, lakip ang mga pwersa sang CPN-M. Sa pagsulod sang CPN-M sa gubyrernong koalision kag pagkapot sini sa signipikanteng bahin sang parlamento, pagpakighiliusa kag makigbuligay sang CPN-M sa lain-lain nga sektor



agud maduso ang mga pagbag-o sosyal, mapasulong ang reporma sa duta kag industriyalisasyon, mapalambo ang demokrasya kag mainsister ang pungsodnon nga kahilwayan kag mga polisiyang anti-imperyalista.

Gintakda sang kasugtanan ang pagpatawag sang isa ka eleksyon sa Mayo 2007 para tukuron ang Constituent Assembly nga amo ang pormal nga magatapos sa monarkiya kag magabalay sang bag-ong konstitusyon para sa tukuron nga koalisyong gubyrno. Pagatukuron ang isa ka bag-ong sistemang pangpulitika nga "nagatib-ong sang tawhanong-kinamatarung, hustisya sosyal kag pagkapare-pareho, regular nga eleksyon, kinamatarung sa pamahayag, pagpasakup sang pumuluyo kag iban pang demokratikong prinsipyo." Igapatawag pagkatapos sini ang panibag-ong eleksyon para tukuron ang gubyrno. Sa lapad sang impluwensya kag gahum sang CPN-M, daku ang posibilidad nga magagum sang CPN-M ang desaysibong bahin, kundi man ang aktwal nga pagpamuno, sa mapilian nga permanenteng gubyrnong koalisyon.

Magapaidalum ang CPN-M sa isa ka interim ukon temporaryo nga demokratikong gubyrno sa pagpamuno ni Koirala samtang di pa natukod ang bag-ong konstitusyon kag wala pa nahiwat ang eleksyon. Luwas sa pagsulod sang mga tiglawas sang CPN-M bilang mga ministro sa ehekutibo nga sanga sang gubyrnong interim, igadugang ang 73 tiglawas sang CPN-M sa parlamento nga ginalakipan sang 209 tiglawas halin sa mga demokratikong partido anti-monarkiya. Igadugang man ang 48 tiglawas sang "katilingban sibil" nga nagasuporta sa paghimakas batuk sa monarkiya. Sa amo nga partehan, ang CPN-M magagguwa nga isa sa duha ka partido nga nagapa-


ngaduha sa Congress Party ni Prime Minister Koirala. Mangin pareho kadaku ang numero sang mga tiglawas sang CPN-M kag sang Communist Party of Nepal-United Marxists-Leninists (CPN-UML), isa ka ligal nga partido pangparlamento.

Mga peligro sa kasugtanan

Samtang ang pagsulod sini sa bag-ong gubyrnong koalisyon may daku nga bentahe kag potensyal para sa demokratikong reporma, nagaatubang man ang CPN-M sa dalagku nga risgo kag peligro, labi na kaangot sang mga probisyon bahin sa kahimtangan sang PLA kag mga istruktura sang rebolusyonaryong gahum pangpulitika kag pati sa seguridad sang Partido kag mga rebolusyonaryong pwersa.

Sa pagpaidalum sang CPN-M sa bag-ong gubyrno, lauman nga pagatinguhaan gid sang reaksyunaryong pwersa sa sulod kag guwa sang Nepal nga lamunon, ikulong kag paluyahon ang CPN-M kag mga rebolusyonaryong pwersa sa mga istruktura, proseso, pagsulundan kag impluwensyang burgis. Lauman man nga pagahimuon sang mga reaksyunaryo kag mga imperyalista ang tanan nga tikang—mapintas kag indi—agud makakas ang armadong kontrol halin sa kontrol sang Partido kag pagkatapos todo-todo nga atakehon ini kag ang mga ginapamunuan sining pwersa. May partikular man nga interes ang US nga mapwesto sa Nepal ang isa ka gubyrnong maki-US para mabilog sini ang kontrol kag impluwensya sa South Asia.

Sa balayon sang kasugtanan, mabaskog nga banggianay ang posible magalupok sa tunga sang CPN-



M kag mga reaksyunaryo sa sulod kag guwa sang bag-ong gubyrno kag sang armadong pwersa sini. Mahimo ini nga ibunga sang himuon nga pagtilipon sang tanan nga pwersa sang PLA sa mga takdang kampo, pagkandado sang ila mga armas, pagbungkag sang mga istruktura sang rebolusyonaryong gahum, kag proseso sang nahisugtan nga integrasyon sang PLA sa Nepal Army (ang anay Royal Nepal Army sang monarkiya ngayara sa kontrol sang bag-ong gubyrno). Sa isa ka bahin, pat-ud nga tinguhaon sang mga reaksyunaryo nga lusawon ang independyenteng armadong kusog sang CPN-M kag ipaidalum ang mga rebolusyonaryong pwersa sa armadong kontrol sang burgesya. Sa pihak nga bahin, daku nga hangkat sa CPN-M kon pano mentinaron gihapon sa amo nga kahimtangan ang absolutong pagpamuno kag independyenteng kontrol sa mga pwersa sang PLA kag tinguhaon nga mapadalam sa impluwensya sini ang Nepal Army.

Nakasaad sa kasugtanan nga samtang indi pa napatuman ang pagsimpon sini sa Nepal Army, igapabilin ang mga pwersa sang PLA sa pito nga *cantonment* ukon malapad nga kampo militar sa nagkalain-lain nga lugar sa pungsod. Ang kadam-an sang deklaradong armas sini igabutang sa mga nakakandado nga talaguan kag ang yabi ila pagakaptan. Pahanugutan lamang sila nga kaptan ang mga armas nga pagagamiton sa pagbantay sa mga nakakandadong armas nila.

Ang pagkaon kag iban pang probisyon kag kinahanglanon sang mga pwersa sang PLA sa mga kampo pagasabton sang gubyrno. Pagabantayan sang mga tiglawas sang United Nations ang proseso ngani.



Bilangon nga iligal ang tanan nga iban pang armas nga indi kapot sang Nepal Army, lakip ang mga padayon nga ginakaptan sang mga milisya sang pumuluyo sa idalum sang PLA.

Igakandado man sa amo nga paagi ang katumbas nga numero sang mga armas sang Nepal Army. Pero bangud may ara 90,000 armas ang Nepal Army (tatlong pilo ukon sobra pa sangsa sa mga regular nga pwersa sang PLA), ang probisyon nga ini sang kasugtanan maathag nga mas yara sa bentaha sang Nepal Army. Luwas diri, samtang nagadugay, ang pagpirme sang PLA sa mga kampo mahimo magaresulta sang pagkahumulag sini sa masa kag mga kabisado nga erya sang pagpakig-away, pagsandig sa gubyerno para sa ila kinahanglanon, kag posible pagdupol kag paghina sa kahandaan sa rebolusyonaryong paghimakas.

Sa pihak nga bahin, nakasaad sa kasugtanan ang reoryentasyon kag pagpanibag-o sang istruktura sang Nepal Army "sandig sa mga demokratikong prinsipyo." Ipaagi sa "rehabilitasyon" ang mga hangaway sang PLA kag igasimpon sa Nepal Army matapos sila maeksamen. Samtang mahimo hingalitan ini sang CPN-M paagi sang pagpukaw kag pag-organisa sa kubay sang Nepal Army, pat-ud nga indi ini basta-basta nga pahanugutan sang mga militarista kag ultra-reaksyunaryo sa militar kag gubyerno sang Nepal, kag pati sang mga imperyalistang may nagadaku nga interes subong sa Nepal.

Kon indi makuha sang CPN ang kumand sa kabilugan sang pagasimponon nga hangaway ukon bisan

desaysibong impluwensya sa signipikanteng bahin sini, kag indi man mapabilin sang CPN-M ang independyenteng absolutong pagpamuno sa mga pwersa sang PLA, may kadelikaduhan nga malunod sila sa sulod sang Nepal Army kag dalayon nga matunaw.

Ginapadali sang gubyerno ang pagkandado sang mga armas sang PLA. Ginagamit ini subong nga kondisyon antes ipasulod ang mga tiglawas sang CPN-M sa gubyerno, nga base sa kasugtanan dapat magsugod na sadtong nga Disyembre 1. Naatras pa ang pagpatuman sini bangud suno sa United Nations, naatrasar man sang pila ka simana ang pag-abot sang ila mga base sini.

Daku man nga peligro nga mahimo igabunga sang pagpasugot sang CPN-M nga itugyan ang kaluwasan sang mga lider kag pwersa sini sa Nepal Army. Sa atubang sang kawad-on sang proteksyon nga mahatag sang kaugalingon nga hangaway kag pwersa pangseguridad, indi gamay ang posible nga katalagman nga igadulot sini sa kaluwasan. Nakasaad man sa kasugtanan ang pagbungkag sa gahum pangpulitika nga gintukod kag ginapamunuan sang CPN-M, nga amo ang nangibabaw sa malapad nga rebolusyonaryong base sa kaumhan. Sa isa ka bahin, mahimo nga mapadayon sang CPN-M ang pagpamuno sa mga pwersa kag pumuluyo sa mga base nga ini paagi sang kaugalingon nga pag-organisa sang Partido, pagpasulong sang kahublagang masa kag pagsiguro nga makaptan sini ang lokal nga gubyerno sa idalum sang gubynong koalisyon.

Sa pihak nga bahin, kon wala

sang masandigan nga armadong pwersa nga yara sa idalum sang pagpamuno sang CPN-M, daku nga peligro nga lubos nga mabungkag ang mga ini, mauk-ok sang garuk nga reaksyunaryong pulitika, madula ang direktang pagpamuno kag impluwensya sang CPN-M sa masa kag madula ang kaugalingon nga kusog subong sa mga hayag nga lider kag pwersa sang CPN-M, lakip na ang hangaway sini. Posible hingalitan ini sang mga ultra-reaksyunaryo, mga pwersa sang napukan nga monarkiya, sang CIA kag iban pang kontra-rebolusyonaryong pwersa lokal kag dumuluong.

Sa paggamit sang gahum pangpulitika kag labi na sa padayon nga pagkapot sini, yabi nga halambalanon ang padayon nga hugot nga pagkapot sang rebolusyonaryong partido sa armas kag absolutong pagpamuno sini sa kaugalingon nga hangaway. Ini ang ginasiling ni Mao sang gindeklarar niya nga "Ang gahum pangpulitika nagaguwa halin sa pusil." Bilang isa ka partido nga nagatib-ong sa mga prinsipyo sang Marxismo-Leninismo-Maoismo, daku nga hangkat ang pagaatubangon sang CPN-M sa pagsulod sa bag-ong sitwasyon, sa pagkahayag nga Partido kag sa pagsimpon sini sa isa ka gubyerno sa kondisyon nga nakakandado ang armas sang hangaway sini.

Ang malig-on kag matalom na pagkapot kag nagakasanto nga riyalistikong aplikasyon sang mga prinsipyo sa pag-atubang sang CPN-M sa ginsudlan sini nga bag-ong sitwasyon sa Nepal mangin desaysibo indi lamang sa lubos nga pagpasulong sang mga demokratikong reporma, kundi pati sa pag-amlig sang mga ini kag pangkon sang labi pa nga mga rebolusyonaryong kadalag-an sa palaabuton.

AB

1 *Caste*- Sistema sang pagtulunga-tunga sang katilingban Hindu nga ginabasehan sing mapintas nga pagpanghimulos kag pagpamigos sang mga yara sa mataas nga andana sang *caste* sa mga yara sa pinakaidalum. Sandig sa sistemang *caste*, ang mga halin sa pinakamanubo nga sahi gindumilian makisimpon man lang sa mga halin sa mataas nga sahi.



Ambus kag disarmas sa North Central Mindanao

NAKAKUHA sang apat ka mabaskog nga armas ang mga Pulang hangaway sang Bagong Hangaway sang Banwa (BHB) sa North Central Mindanao sa gintigayon nila nga pagpanglambat kag operasyong disarma sining Disyembre batuk sa mga pwera sang reaksyunaryong gubyrno.

Suno sa report ni Ka Cesar Renerio, tagapamaba sang National Democratic Front sang North Central Mindanao, isa ka M14 kag isa ka karbin ang nakumpiska sang Rexan Perez Command sadtong Disyembre 7 sang disarmahan sini ang isa ka elemento sang Civilian Armed Forces Geographical Unit (CAFGU) sa Silae, Malaybalay City. Nakumpiska naman ang isa ka iskward sang BHB sa idalum sang Eking Balacuit Command sang isa ka M203 *grenade launcher* kag isa ka M16 sa ambus nga ginlunsar sadtong Disyembre 4 sa Barangay Tinagan, Salay, Misamis Oriental. Lulan sang isa ka salakyan ang apat nga suldado sang 8th IB sang Philippine Army sang ambusan sila bandang alas-3:40 sang hapon. Duha ka elemento sang militar ang napilasan samtang paspas nga nagdalagan ang duha pa ka suldado dungan bilin sang ila mga armas.

Pagpanglambat sa Masbate

APAT ang napatay nga mga elemento sang 507th Provincial Mobile Group sang Philippine National Police (PNP) sa ambus nga ginlunsar sang BHB sa Placer, Masbate sining Disyembre 17 sang hapon. Suno sa mga inisyal nga report, nagaagi ang mga pulis sakay sa isa ka bangka nga de-motor sa baybayon sang Barangay Manlut-od bandang ala-5:40 sang hapon sang palukpan sila sang mga Pulang gerilya.

Panugyan nga bansagan nga "komunista" ang BM, iban pa, ginpakamalaut

GINPAKAMALAUT ni Cong. Satur Ocampo sang Bayan Muna ang ginaproponer ni National Security Adviser Norberto Gonzales nga upisyal nga bansagan nga "mga komunista" ukon mga "prenteng organisasyon" ang Bayan Muna, Anakpawis kag Gabriela Women's Party. Suno kay Ocampo, labi lamang sini nga ginadabukan ang militar nga himuon nga target sang pagpamatay ang mga partido nga ini.

Tuyo sang sining ginapanugyan ni Gonzales nga himuon nga upisyal ang madugay na niya nga ginapamilit nga ilakip ukon iangot sa armadong hublag ang mga ligal nga progresibong partido kag organisasyon.

Gintumod ni Ocampo nga ang masobra 800 biktima sang ekstrahudisyal nga pagpamatay sang mga death squad sang estado halin 2001 lunsay ginbansagan nga mga komunista antes sila ginpatay. Sa sini, siling ni Ocampo, daw sentensya sang kamatayon ang mabansagan nga maki-Wala ukon komunista.

12th ASEAN Summit, ginkansela

HINALI nga ginkansela ni Gloria Macapagal-Arroyo ang ika-12 ASEAN (Association of South East Asian Nations) Summit sadtong Disyembre 8, duha ka adlaw antes ang nakatalana nga pagsinapul sa Cebu City sang mga lider sang napulo ka myembro nga nasyon. Wala sing nagpati nga ang nagapadulong sadto nga bagyong "Seniang" ang dahilan sang kanselasyon sini pakadto Enero.

Pangpulitika nga bagyo ang dahilan sing gulpehanay nga kanselasyon, suno sa BAYAN-Central Visayas. Antes ang pagpaway sang ASEAN Summit, nagsugod na ang mga aksyong protesta sa Cebu City batuk sa globalisasyon kag iban pang imperyalistang dikta kag nagasugod naman sa pag-indakal sa Kamaynilaan sang mga paghulag bunga sang pagratsada sang mga iduido ni Arroyo sa Kongreso sa "pinasimple nga *con-ass*."

Dismayado nga nagpauli ang mga dumuluong nga delegado pila ka oras pagkatapos mapaabot sa ila ang kanselasyon. Isa lamang si Akira Amari, isa ka ministro sang Japan nga indi makapati sa rason nga ginhatag ni Arroyo. Siling niya, nakulbaan si Arroyo sa mga pagpamahug sang "mga terorista" gani wala gindayon ang 12th ASEAN Summit. Gindampigan ini ni Prime Minister Hun Sen sang Cambodia. Nadulaan na sing kredibilidad ang gubyrno sang Pilipinas bangud diri, suno sa isa ka pahayagan sa Thailand.

Samtang, ginpadayon gihapon sang International League of Peoples' Struggle (ILPS) ang ila kontra-kumperensya batuk sa militarismo sang US kag gera batuk sa terorismo. Gintalakay sang 130 delegado halin sa 20 pungsod ang mga implikasyon sang pangkalibutanong gera sang US kag nag-isa sa mga pamaagi para batuan ini. Ginlunsar ang kampanya sa East Asia kag Oceania batuk sa base militar sang US. Ang US may 850 base militar sa 138 pungsod sa bilog nga kalibutan.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXVII No. 24
Disyembre 21, 2006
www.philippinerevolution.net

Editorial

Indi mag-untat ang pumuluyo Sa pagbato sa padihut nga Cha-cha

Sunud-sunod ang mga kapaslawan nga gin-angkon sang rehimeng Arroyo sa pagpamilit sini nga idu-so ang Cha-cha (*charter change* ukon pagbag-o sang konstitusyon) antes ang eleksyon sa Mayo 2007. Isa-isa nga nalugaw-an ang mga ginpadihut sini nga pamaagi agud matuman ini.

Una amo nga ginbasura sang Korte Suprema ang peke nga people's initiative nga nagatuyo nga baguhon ang sandigan nga layi paagi sa petisyon kuno sang minilyon nga pumuluyo. Nabuyagyag ini bilang daku nga pagpanunto sang mga idu-ido ni Arroyo.


Makaligad nga mauntat ang peke nga *people's initiative*, pila ka simana lamang ang naglipas gintuyo naman nga ilusot sang mga gaway ni Arroyo sa Kongreso ang "pinasimple nga *constituent assembly*" ukon "*con-ass*" nga nagapwera sa Senado, padalasa nga pag-transporma sang Manubo nga Panaligan padulong sa asembleya nga magabag-o sa porma sang gubyrno halin presidensyal pakadto parlamentaryo kag pagpahigad sa regular nga eleksyon sa Mayo pakadto sa Nobyembre sa idalum na sang sistemang parlamentaryo.

Hayagan nga ginatorse sang maki-Arroyo nga mga kongresista ang layi kag establisadong mga proseso agud ipamilit ini. Ang ining tuman ka baghal nga manipulasyon kag pag-

panglubag para ipilit ang "pinasimple nga *con-ass*" nag-ani sang grabe nga kaakig kag mabaskog nga pagkundena sang malapad nga kubay sang pumuluyo. Nagpamahog ang nagkalain-lain nga sektor sang paglunsar sing wala untat nga dalagkuan nga protesta nga nagaduso na sa rehimen sa bibi sang pagkapukan. Napilitan si Arroyo nga ipaiway anay ang "*con-ass*" para maglugdang ang nagaindakal nga kaakig sang pumuluyo.

Sa amo man, gintinguha gihapon ni Arroyo nga magkambyo kag gilayon naman nga ginduso sang mga sugo sang Malakanyang ang paspasan nga *constitutional convention*. Ginsuhestyon nila ang pagpili sang mga delegado para diri sa maabot nga Mayo kadungan sang regular nga eleksyon.

Wala na ini ginpalampas sang nagabalingaso nga pumuluyo. Bistado na nila nga



**Mga tampok
sa isyung ini...**

Cha-cha, ginsug-alaw
sg protesta PAHINA 3

Kinamatarung sg
Pilipinas nga ibilanggo
si Smith PAHINA 5

Kasugtanan
pangkalinungan
sa Nepal PAHINA 8

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angba-yan@yahoo.com*